

## Resúmen

### Enkargo i investigashon

Riba 4 di òktober sekretario di estado di Infrastruktura i Kalidat di Awa (IenW) a pidi Inspekshon di Medioambiente i Transporte, (Inspectie Leefomgeving en Transport (ILT) pa hasi un investigashon riba dunamentu di pèrmit, supervishon i mantenshon (di lei) (VTH) na Boneiru, Sint Eustatius i Saba. E sekretario di estado a pidi pa hasi rekomendashonnan tambe pa mehorá e sistema i pa introdusí 'checks and balances'. A hasi e investigashon den koordinashon ku minister di Naturalesa i Nitrógeno di ministerio di Agrikultura, Naturalesa i Kalidat di Alimento (LNV).

Riba 10 di òktober 2022, gezaghebber di Boneiru a puntra si ILT por a hasi un evaluashon di e trayekto di mehorashon interno di entidat públiko Boneiru ku ta kanando i si por a saka konklushonnan di esei relashoná ku supervishon i mantenshon (di lei) riba tereno di medioambiente i ambiente di bida.

E rapòrt akí ta kumpli ku ámbos petishon i ta limitá su mes na ehekushon di e tareanan di VTH relashoná ku konstrukshon, medioambiente i naturalesa na Boneiru. Pa e investigashon e tim di proyekto di ILT i LNV a hasi 2 bishita na Boneiru. Ademas a hasi entrevista i a studia dokumento i rapòrt. Empleadonan di OLB, sin duda, a suministrá informashon pa e investigashon i a pèrkurá pa e tim di proyekto por a entrevistá e personanan deseá.

### Resultado di e investigashon di VTH

ILT ta konkluí ku implementashon di di e tareanan di VTH relashoná ku konstrukshon, medioambiente i naturalesa no ta kumpli ku e eksigensianan legal i ordenansanan lokal. E konklushon akí ta basá riba e opservashonnan akibou menshoná.

#### En general

- Kolegio ehekutivo a stipulá e Programa di implementashon Supervishon i Mantenshon, falta un programa di inspekshon korespondiente.
- Direktorado di Planifikashon i Desaroyo (DR&O) ta entre otro responsabel pa otorgamentu di pèrmit. Direktorado Supervishon i Mantenshon (DT&H) ta responsabel pa supervishon i mantenshon. Den e direktoradonan akí falta 'checks and balances' nesessario, manera un plan konkreto stipulá, prosesonan di trabou stipulá i evaluashon evaluashon kolegial.
- E proseso di VTH no ta transparente. OLB no ta hasi uso adekuaado di sistemanan digital pa dunamentu di pèrmit, ehekushon di supervishon i mantenshon verifikabel. Registrashon di dokumento ta deficiente i ta tuma lugá na diferente manera.
- DR&O i DT&H no ta manehá ku enfoke riba ehekushon di tareanan di VTH.
- DR&O i DT&H no ta koordiná e trabounan di forma struktural ku otro. Pa e motibu akí falta un aserkamentu integral pa dosiènan kompleho.

#### Dunamentu di pèrmit

- DR&O no tin un bista general aktualisá di kompanianan ku tin mester di un pèrmit di molèster.
- No ta embolbí e conseheronan rekerí pa lei òf no ta embolbí nan na tempu (inkluyendo e Komishon Maneho di Naturalesa Boneiru, brantwer i sekshonnan interno) den un prosedura di pèrmit.
- No ta publiká (konsepto di) pèrmitnan òf no ta publiká nan na tempu, di manera ku no ta informá esnan interesá òf no ta informá nan na tempu. Esaki tin konsekuensia pa nan posishon hurídiko.
- Tin retraso relashoná ku otorgamentu di pèrmit. No ta tene términonan legal na bista.

#### *Ehèmpel*

Ta resultá ku un depósito, dak i fábrika den konstrukshon no tin pèrmit di konstrukshon. Despues di un par di luna ta finalisá e trabounan di konstrukshon i OLB ta duna un pèrmit di konstrukshon pa e depósito i dak. Pa e fábrika no a duna pèrmit di konstrukshon.

### Supervishon

- No ta ehekutá supervishon den forma planifiká i solamente a base di keho i insidente.
- DT&H ta bisa ku pa esei ta hasi uso di e kapasidat di supervishon kompleto.

#### *Ehèmpel*

Despues di kehonan persistente di habitantenan den besindario tokante molèster, un kompania di desperdisio riba propio iniciativa ta laga hasi un investigashon. Basá riba e resultadonan e kompania ta disidí di para e fòrnu di kombustion. OLB no proba ku a inspektá e empresa akí.

### Mantenshon

- Den kaso di violashonnan no ta hasi mantenshon (di lei) di forma konsekuente.
- No ta sigui di forma konsekuente ku mantenshon (di lei) i ku kobransa di multanan imponé, di manera ku no ta koregí violashonnan.

#### *Ehèmpel*

A realisá 2 proyekto di konstrukshon riba kosta sin ku a duna tur pèrmit di naturalesa i di konstrukshon rekerí. Pa e motibu ei no a tuma e medidanan korekto pa protehé kosta i koral. Akshon pa mantené lei di parti di OLB no ta kondusí na korekshon di e violashonnan.

### **E kousanan di esaki**

OLB ta hañ'é konfrontá ku diferente puntonan problemátiko ku ta opstakulisá ehekushon korekto di VTH. ILT ta distinguí diferente kousa.

### Personal i en organisashon

- Ta eksigí mas di e personal, miéntras ku kapasitashon i guia den ehekushon di e tareanan a keda atras.
- Ta difísil pa yena vakaturanan, pa gerensia tambe, i ta keda habrí pa largu tempu. Regularmente no ta prolongá nombramentunan despues di un periodo di 3 aña. Esaki ta bai a kosto di kontinuidat i sentido di responsabilidad.
- Diferente trayekto di mehorashon ta kana pa largu tempu banda di otro, sin ku tin un fecha di finalisashon stipulá. Esaki ta kondusí na vaguedat tokante responsabilidad den e struktura organisatorio.

### Rekurso- i prosesonan

- No ta hasi uso sufisiente di sistemanan di sosten di VTH i di registrashon di dokumento.
- Regularmente ta presentá maneho, programa i plannan di proyekto na kolegio ehekutivo, sin ku kolegio ehekutivo ta atendé òf stipulá esakinan.

### Kultura i influensia atministrativo

- OLB no ta ofresé un ambiente di trabou sigur kaminda empleadonan ta sintí ku nan tin sosten di mando atministrativo ora nan mester tuma desishonnan ku no ta konta ku aprobashon atministrativo.
- Ta instruí empleadonan di OLB pa duna pèrmit. Tambe ta intimidá nan pa no kuminsá òf sigui ku akshonnan den kuadro di mantenshon (di lei).
- For di dosiènan ku a investigá ta resultá ku despues ta legalisá situashonnan ilegal. Esaki por ta aseptabel den situashonnan eksepsional, sinembargo na Boneiru esaki ta sosodé regularmente.

### Embolbimentu di Gobièrnu Sentral

- Gobièrnu Sentral ta enfoká riba maneho i programashon, miéntras ku e implementashon real ta risibí poko atenshon.
- A posponé e fecha di entrada na vigor di e Desishon di Establesimentu i Aktivitat BES diferente bia. Pa e motibu ei empresarionan i OLB ta tuma un aktitut di sinta warda relashoná ku petishonnan i otorgamentu di pèrmitnan di molèster.
- Representante di Reino tin e kompetensia pa apliká supervishon intergubernamental (IBT), pero falta un kuadro di maneho pa aplikashon di IBT i no a nombra supervisoran pa duna sosten pa e tarea akí.
- Bishitanan di trabou, gruponan piloto i taskforcenan ku un nivel di ambishon ku no ta kuadra ku e forsa ehekutivo ta forma un peso pa OLB. Pa e motibu ei trabounan regular ta haña ménos prioridat.

### **Konklushon**

Implementashon di e tareanan di VTH di parti di OLB no ta na òrdu. Den e proseso falta siguridad huridiko, loke ta pone ku por surgi arbitrariedat. E interesnan ku legislashon riba tereno di konstrukshon, medioambiente i naturalesa ta pretendé di ta protehé, no ta ser protehé òf no ta ser protehá sufisientemente. Esfuersonan di parti di OLB i Gobièrnu Sentral pa trese mehorashon den esaki no a duna sufisiente resultado. Debí na e kantidat di kousanan akí, hopi biaha fuertemente ligá na otro, ta rekerí un kambio fundamental di e tareanan di VTH pa logra mehorashon.

OLB no tin e konosementu i eksperensia rekerí pa por ehekutá e tareanan di VTH adekuadamente. No a duna pèrmit pa diferente kompania i aktivitat. No ta embolbí (konsekuentemente i na tempu) konseheronan rekerí pa lei ora di dunamentu di pèrmit. No ta publiká desishonnan (manera debe ser) i e prosesonan no ta transparente. Supervishon ta tuma lugá riba base ad hoc i mantenshon no ta kondusí na drecha e violashon.

E tamaño di Boneiru komo komunidad chikitu i distansia kòrtiku ku gobernantenan ta hasi ehekushon profeshonal i independiente di e proseso di VTH mas difísil. Esaki ta ser reforsá pa motibu di falta di 'checks and balances' adekuaado den e organisashon. E Representante di Reino den su ròl komo último 'check and balance' den e proseso di VTH ta duna kontenido limitá na e responsabilidat akí. E tin kompetensianan sí, pero no tin supervisoran pa dun'é sosten den su tareanan.

### **Rekomendashonnan**

ILT ta hasi e siguiente proposishonnan pa mehorashon di implementashon di e tareanan di VTH relashoná ku konstrukshon, medioambiente i naturalesa.

#### Rekomendashon 1 (Gobièrnu Sentral)

Pone riba término kòrtiku e ehekushon di e pakete kompleto di tareanan di VTH pa konstrukshon, medioambiente i naturalesa bou di 1 servisio ambiental eksistente na Hulanda Oropeo. Asina ta garantisá konosementu, eksperensia i kontinuidat i ta logra pa krea distansia for di gobernantenan.

- Konforme e situashon na Hulanda Oropeo, kompetensia i responsabilidat final ta keda serka entidat públiko. Ta pone ehekushon di e tareanan bou di e servisio ambiental. Entidat públiko ta duna mandato na e direktor di e servisio ambiental akí pa firma pèrmitnan i desishonnan di mantenshon (di lei).
- Kuminsá mesora ku inventarisashon i eliminashon di retrasonan den dunamentu di pèrmit serka OLB ku sosten i bou di direkshon di e servisio ambiental.
- Debí na e distansia físiko di Boneiru tin mester di atenshon speshal pa implementashon práktiko di e tareanan di VTH. Por logra esaki, pa medio di estrecho embolbimentu di e aktual dunadónan di pèrmit di OLB den ehekushon di e tareanan bou di direkshon di e servisio ambiental.

#### Rekomendashon 2 (OLB)

Atendé e puntonan problemátiko siñalá den e organisashon atministrativo di OLB rápidamente i dirigí, den estrecho kooperashon ku e servisio ambiental menshoná den rekomendashon 1. Apesar di rekomendashon 1 t'asina ku OLB lo sigui ehekutá un parti di e proseso di VTH.

- Struktura organisatorio: Duna klaridat riba proyektonan di mehorashon ku ta andando pa medio di e Grupo piloto Plannan di Mehorashon DR&O/DT&H i terminá e proyektonan aki mas pronto posibel.
- Personal i Organisashon: Duna prioridat na rekrutamentu pa e vakaturanan den e proseso di VTH i na finalisashon di proyektonan andando, inkluyendo e asina yamá proyekto 'Revitalisashon di OLB'.
- Guia: Stipulá anualmente prioridatnan i mara esakinan na un planifikashon di trabou konkreto. Ehekutá e trabounan i vigilá nan progreso.
- Uso di ICT: Hasi un eskoho kla pa sistemanan di apoya. Pèrkurá pa instrukshon di empleadonan i guianan pa nan hasi uso konsekuente di e sistemanan akí.

### Rekomendashon 3 (Gobièrnu Sentral i OLB)

Pèrkurá, den estrecho koordinashon ku OLB, pa lei i regulashon aktualisá i adekuaado pa konstrukshon, medioambiente i naturalesa.

- Spesifikamente pa konstrukshon: Evaluá e aktual ordenansa di konstrukshon i duna klaridat tokante legitimidat di ordenansanan di konstrukshon bieu (OLB i Gobièrnu Sentral). Hasi uso di e Kódigo di BES pa kumpli ku eksigensianan funshonal di e Desishon di Konstrukshon i ankra e kódigo akí den un Areglo Ministerial.
- Spesifikamente pa medioambiente: Pèrkurá pa e IAB BES drenta rápido na vigor, di manera ku ta regulá kompanianan ku tin impakto potensial mas grandi riba medioambiente. E IAB BES ta suministrá e kuadro nesessario pa programashon i ehekushon di dunamentu di pèrmit i supervishon.
- Spesifikamente pa naturalesa: Evaluá si tur e kategorianan pa kua un pèrmit di naturalesa ta rekerí, mester kana un proseso ku konseho amplio (OLB). Evaluá si mester apuntá áreanan delikado i zonanan delimitá (Gobièrnu Sentral).

### Rekomendashon 4 (Gobièrnu Sentral)

Fortalesé posishon di e Representante di Reino pa loka ta trata implementashon di e tarea di IBT.

- Stipulá un kuadro di maneho pa aplikashon di hèrmèntnan di IBT.
- Pèrkurá pa nombra supervisoran pa duna sosten atministrativo ora di ehersé e tarea di IBT akí.